



**GIG**  
CYMRU  
**NHS**  
WALES

**Addysg a Gwella Iechyd  
Cymru (AaGIC)**  
**Health Education and  
Improvement Wales (HEIW)**

Diweddariad misol yw hwn i bartneriaid a rhanddeiliaid ar ddatblygiad Addysg a Gwella Iechyd Cymru (AaGIC) gan ei Brif Weithredwr, Alex Howells.

Bydd y sefydliad newydd, a fydd yn awdurdod iechyd arbennig a'r unfed aelod ar ddeg o deulu GIG Cymru, yn cael ei sefydlu'n ffurfiol ar 1 Hydref 2018.

**Helpwch ni i ledaenu'r neges am Addysg a Gwella Iechyd Cymru drwy gylchredeg y bwletinâu hyn i'r holl staff.**

**Pwy ydym ni?**

*Awdurdod iechyd arbennig sy'n cael ei sefydlu o fewn y GIG er mwyn integreiddio a chynyddu arbenigedd ym meysydd cynllunio, datblygu, llunio a chefnogi'r gweithlu iechyd, yw Addysg a Gwella Iechyd Cymru. Byddwn yn weithredol o 1 Hydref gan ddwyn ynghyd Ddeoniaeth Cymru, Canolfan Addysg Fferylliaeth Broffesiynol Cymru (WCPPE) a Gwasanaeth y Gweithlu, Addysg a Datblygu (WEDS). Bydd ein swyddogaethau yn cynnwys: datblygiad strategol y gweithlu, gwybodaeth am y gweithlu, addysg a hyfforddiant y gweithlu, datblygu a moderneiddio'r gweithlu, datblygu arweinyddiaeth, gyrfaoedd ac ehangu mynediad.*

Mae'n anodd credu bod y gwyliau haf eisoes ar ben. Mae'n anoddach fyth credu mai dim ond tair wythnos sydd ar ôl tan y byddwn yn "mynd yn fyw" yn swyddogol.

Mae llawer o gynnydd wedi cael ei wneud a hoffwn achub ar y cyfle hwn i roi'r wybodaeth ddiweddaraf i chi am ambell beth.

## **Gweledigaeth, Pwrpas, ac Amcanion Strategol**

Dros y mis neu fwy diwethaf, rydym wedi rhannu drafft terfynol o'n gweledigaeth, ein pwrpas a'n hamcanion strategol drwy e-bost, mewn cyfarfodydd a digwyddiad i randdeiliaid. Fe wnaethom ofyn i chi a oeddent yn cynnwys ac yn adlewyrchu'r hyn rydych yn ei ddisgwyl. Diolch i bawb sydd wedi rhoi adborth.

Rydym wedi ystyried hynny, ynghyd â barn ein staff ac erbyn hyn mae gennym fersiynau terfynol fel a ganlyn:

### **Gweledigaeth: "Trawsnewid y Gweithlu i Sicrhau Cymru Iachach"**

**Pwrpas** Addysg a Gwella Iechyd Cymru yw integreiddio a chynyddu arbenigedd a galluedd wrth gynllunio, datblygu, llunio a chefnogi'r gweithlu iechyd, er mwyn sicrhau bod gennym y staff cywir gyda'r sgiliau cywir i ddarparu gwasanaethau iechyd a gofal o'r radd flaenaf i bobl Cymru.

Bydd ein rhaglen waith a'n hamcanion am y 3 blynedd nesaf yn cael eu llywio gan yr **amcanion strategol** a ganlyn:

- 1. Sefydlu Addysg a Gwella Iechyd Cymru fel sefydliad newydd sy'n bartner gwerthfawr y gellir ymddiried ynddo, sy'n gyflogwr ardderchog a chanddo frand dibynadwy ac arbenigol.** *Mae hyn yn adlewyrchu'r gwaith sydd ynghlwm wrth greu sefydliad newydd a bydd yn parhau y tu hwnt i 1 Hydref.*
- 2. Datblygu gweithlu iechyd a gofal cynaliadwy a hyblyg ar gyfer y dyfodol.** *Mae hyn yn ymwneud â mabwysiadu dull mwy strategol o gynllunio gweithlu'r dyfodol, gan gyfuno'r holl elfennau sydd eu hangen i'w gyflawni h.y. addysg, hyfforddiant, datblygu swyddi, llwybrau gyrfa, datblygiad proffesiynol parhaus etc.*
- 3. Ochr yn ochr â Gofal Cymdeithasol Cymru, llunio'r gweithlu i ddarparu gofal yn nes at y cartref a sicrhau mwy o gysondeb o ran y gwasanaethau a ddarperir.** *Mae hyn yn cydnabod yn benodol y symudiad strategol sy'n angenrheidiol wrth ddatblygu ac ehangu'r gweithlu sylfaenol a chymunedol er mwyn cyflawni'r strategaeth gwasanaethau.*
- 4. Gwella ansawdd a diogelwch drwy gefnogi sefydliadau'r GIG i ganfod atebion cyflymach a mwy cynaliadwy sy'n ymateb i heriau'r gweithlu wrth ddarparu gwasanaethau sy'n flaenoriaeth.** *Bydd hyn yn gofyn i ni sicrhau bod ein harbenigedd a'n profiad yn cyfateb i heriau presennol y GIG, gan ddangos gwerth ychwanegol am arian yn y tymor byr.*
- 5. Gwella'r cyfleoedd i ddefnyddio technoleg a digidoleiddio wrth gyflwyno addysg a gofal.** *Mae hwn yn faes sy'n datblygu'n sylweddol ac mae cysylltiad agos rhyngddo â Chymru Iachach.*
- 6. Adfywio datblygu arweinyddiaeth a chynllunio olyniaeth ar draws y meysydd iechyd a gofal cymdeithasol mewn partneriaeth â Gofal Cymdeithasol Cymru ac Academi Cymru.** *Mae hyn yn cysylltu'n uniongyrchol ag un o'n swyddogaethau newydd fel sefydliad.*
- 7. Dangos gwerth yn sgil buddsoddi yn y gweithlu a'r sefydliad.** *Bydd hyn yn golygu bod yn rhaid inni fod yn gwbl glir am y manteision sy'n cael eu cyflwyno gennym a sut rydym yn eu mesur.*

Byddwn hefyd yn derbyn Llythyr Cylch Gorchwyl gan Lywodraeth Cymru a fydd yn gosod disgwyliadau a blaenoriaethau penodol ar y sefydliad. Mae disgwyl y bydd y rhain yn cyd-fynd â'r amcanion strategol uchod.

### **Gwaith Partneriaeth: Strategaeth Gweithlu Cymru Iachach**

Mae cyfarfodydd rheolaidd gyda Gofal Cymdeithasol Cymru yn cael eu cynnal er mwyn symud ymlaen gyda datblygu a llunio Strategaeth y Gweithlu. Mae manyleb ar y cyd yn cael ei datblygu i'w thrafod gyda Llywodraeth Cymru ganol mis Medi.

### **Gwaith Partneriaeth: Cysylltiad â'r GIG**

Cynhaliwyd cyfarfodydd â Bwrdd Iechyd Prifysgol Aneurin Bevan a Bwrdd Iechyd Addysgu Powys yn ogystal â darparu mewnbyn parhaus i gyfarfodydd grwpiau cymheiriaid. Pan ddaw'r rhain i ben, ddiwedd mis Medi, bydd crynodeb o'r adborth o'r cyfarfodydd hyn yn cael ei ddefnyddio i lywio fframwaith clir ar gyfer ymgysylltu â'r GIG yn y

dyfodol.

## Lansio a "Mynd yn Fyw"

Mae gwahoddiadau i ddiwyddiad lansio Addysg a Gwella Iechyd Cymru, ar 24 Medi 2018, wedi'u hanfon gan Lywodraeth Cymru ac rydym yn edrych ymlaen at weld llawer ohonoch yno. Cofiwch gofrestru erbyn Medi 14; [heiw@gov.wales](mailto:heiw@gov.wales).

Mae staff o'r tri sefydliad yn paratoi stondinau gwybodaeth er mwyn rhannu eu gwaith gyda chi a dangos sut maent yn cefnogi cydweithwyr a gwasanaethau gofal iechyd.

Mae 24 Medi yn ddyddiad arwyddocaol; rydym yn "mynd yn fyw" ar 1 Hydref, pan fydd staff o Ddeoniaeth Cymru a Chanolfan Addysg Fferylliaeth Broffesiynol Cymru (WCPPE) yn symud i Bencadlys Addysg a Gwella Iechyd Cymru yn Nantgarw.

Bydd llawr uchaf yr adeilad yn dal i gael ei adnewyddu a bydd ein cydweithwyr o Wasanaeth y Gweithlu, Addysg a Datblygu (WEDS) yn ymuno â ni yn swyddogol pan fydd hyn wedi'i gwblhau.

Mae llawer o waith yn gysylltiedig â'r trefniadau hyn ac rydym yn gobeithio y bydd y cyfan mor ddidrafferth â phosibl, ond gofynnwn i chi fod yn amyneddgar yn ystod y dyddiau cyntaf, tra byddwn yn gosod offer TG a thra bydd y staff yn symud i mewn.

## Recriwtio

Mae llunio a gwerthuso swyddi a recriwtio yn parhau i fod yn weithgareddau sylweddol ar gyfer y Rhaglen a Thîm AaGIC. Rydym yn ddiolchgar iawn i lawer o bobl sydd wedi'n helpu a'n cefnogi gyda'n proses recriwtio, o'r rhai sydd wedi eistedd ar baneli i'r llu o bobl sydd wedi rhannu'r cyfleoedd gwaith hyn.

Mae Danielle Neale, Cyfarwyddwr Cyllid a Gwasanaethau Corfforaethol a Dafydd Bebb, Ysgrifennydd y Bwrdd bellach wedi ymuno â'r sefydliad, a bydd yr Athro Push Mangat, ein Cyfarwyddwr Meddygol, yn ymuno yn ystod wythnos olaf mis Medi.

## Cyfarfod y Bwrdd

Bydd Bwrdd AaGIC yn cwrdd ddechrau mis Hydref er mwyn cadarnhau eitemau fel rheolau sefydlog a pholisïau. Yna, bydd yn gweithredu'n llawn yn y cyfarfod nesaf ym mis Tachwedd.

Diolch yn fawr am eich cefnogaeth barhaus,

*Alex Howells*

*Prif Weithredwr Addysg a Gwella Iechyd Cymru (AaGIC)*

